



## 7. Mani hindan ah Lalpa chawihawi :

Leng David in Sam 103 na'n "Aw ka hinna, Lalpa paak inla, ka sung ah um zosiate hin, a min thiangtho pak tau hen." Tulai ah gel kham tak hi ah ka hiat chu Pathian chawihawi leh pak hi i ha gen un i ki ha zil ua, a diak in KKP te'n i hun tam tak uh La Pawl zilnaten i mang ua. Kipak a um ma ma hi. Chun, nidaang sang in La Pawl sak le i thiam deu deu ua lung dam a um hi. A hin Pathian chawihawina dik tak hi a khawi pen ahi diam ti ka ngaitua ah Thuthang Lui leh Thuthang Thakl ah Bible i et chun, kua le Pathian in ahi di leh gen di a tite ginum tak ah bawltute hinna'n Pathian a kichawihawi sek hi. Etsakna'n- Noah kuangtu ding in a sawl a Pathian in a tigual tak in a bawl zo ah. A inkuan uh leh ganhing chitin in damna a nei khawlaw u'i.

Chun, Sawlchak Paul leh Sila khan Philippi khawpi ah chanchinpha a gen ziaak un sawisak in a um ua suangkul

ah khum in a um u'i. Amaute gel hi tam vei tak a vawk zawnung un suangkul ah a khum uh a hi. Chuleh a keng ua bul det tak in a bultuk tau hi. Zia dinmun ah a um lai ua chun Paul leh Sila chu a pauchap ua, Pathian p'ak in la a sau a, suangkul ngakte zosia'n a ngaithau ah. Thakhat in lin a hung kiling a, suangkul kawtkhak zosia le a hung kihawng a, suangkul ngak ah kawlbulte chule a hung kiphel zo ta (Nasepte 16: 22-26). Zia suangkul thim leh namse tak, migilo leh thil phalo bawlte khum khawmna mun in le Paul leh Sila ten Pauchap in Pathian pakna la sa'n a hinnau in Pathian a chawi hawi uh a hi. Simtu dawitak tu kum thak a hin ei un le Lalpa'n hi ding ah ei guat piakte taima tak leh ginum tak in nisinin s'em leh zil in eimau dinmun chiat ah Lalpa chawi hawi ah, Bartimai mitthumpa gual ah Lalpa ah ginna dettak nei ah a ma zui a, i hinau ah Pathian chawihawi zing ding in hun malzawl ta hen.



## TUCHUNG KHRISTMAS HIH BANGTI'N LA MANG DIAM ?

Hinna V'ak simtute zosia i Hukdampau leh Lal Jesu min thiangtho in **KHRISTMAS CHIBAI !**

Khristmas umzia chu "Khrista Luai" ahem "Khrista hiat zingna luai" tina a hi. Chun, "Khrista pian Champha Lawpna luai" le tithei a hi kit bawk hi. Khristiante a ding in Khristmas hih ni lopi, ni kipakum a hi. Khristmas ni hi Khristian te a dingin kumkhat sunga nibik pawimaw pen a hi ti leu hin gen khial khel pua'itui. Zia ni pawimaw tak hi khawvel gam bung chuam chuamte mat dan leh nit dan a chuam chiat ah. Maleh, a pawimaw zawk leh i matna jiaak pen tak uh chu Lal Jesu Khrista, Pathian chapa, khawvel hukdam dinga a hung pianna chu a hi (Lk. 2:11). I Hukdampau dinguh hung pian ni (Khristmas) hi bang ziaaka em i chan lo thei lo ding uh. Pathian awi lote nangawn inle zia ni hi chawl ei veu! (Office leh nasep dang dang le a chawl u'i). Jesu pianni, December 25 i mat sek uh hi a ni sang ahin JESU hi a pawimaw zaw a hi.

Khristmas mat hin nek leh dawn thu ate, sil leh chen a pha leh a thak thu a imat a hi chun a lawsam zinga ahia, a pian champha (Birthday) neitu chu mulo ihu. Jesu Angelte'n a la tang lo piu, Jawlneite'n ala gen lawk hi eimau misual – sual ngaidamtu a pawm theite chu Khristmas mangtu a vangpha hi ding a hui. Khristmas i matnau ahin Lalpa a dingin bang ka hi thei diam ti ki ngaitua in i hinna leh i nei le lam te Lalpa a dingin la'n thak kit hitiu. Chutichun, Khristmas ila mat sekna ziaak chu hiachian tai'tiu in Lalpa chu Michingte gualin i gobawmteu hawngin chibai buk thei tai'tiu. Khristmas ni ahin- Lengte Leng – Lalpate Lalpa chibai (*worship*) nan bang la pe diam?

December issue ahin Khristmas sermon leh Kum thak sermon tampi a um ah. Ziate chu phatchuam ngaitaka i sim ua i zui nak ua chun tukum Khristmas leh Kum thak lawk takin mang thei ngei hitiu. Tuchung Khristmas hih bangtin ka mang diam? ti kidawng pumin Khristmas a lawk thei penin mat gua chiat hitiu.

Lalpa'n Hinna V'ak simtu zosia malzawl chiat ta hen.



## EMMANUEL, I KIANG UA UM PATHIAN AHI.

*Sim ding: Gen. 39:2; Sam 46:1, 2.*

*-Rev C. Zoramawia, AS*

Pathian in Israel chate puidawk ding ah Mosi a ko a khan Mosi kiang ah Pathian kijiatsak dan chu 'UMZINGPA' Pathian ahi. (Exo. 3:14). Joshua king in "*Lalpa la Pathian chu la chiana taphawt in hun umpi zing ding ahi*" ti in a gen hi (Jos 1:9). Pathian chu I chiana taphawt ah I umpi zing ding ah kitiam ahi. Zia gual ngei a chun Pathian in a mite a umpi zing sek hi. Abraham kiangin Pathian a um zing ah, Joseph ngei kha le Pathian in a taisan diak puai, "*Lalpa chu Joseph kiang in a um zing a*" (Gen 39:2, 21). Pathian chu ei umpitu a hi zia in, A min ah le 'Immanuel, I kiang un Pathian a um zing hi' ti ahi.

**1. Haksatna mun ah ei umpitu ahi:** pathian chu bangtik lai ah le ei umpitu a hi gualin haksatna mun ah le ei umpitu ahi. Joseph chu Potifar in ah suak a hia, mifel tak a hi zia in a pu'n a muang ma ma hi. A pu ngei inle Joseph kiang in Lalpa a um a, a thil hi taphawt in a lawting zel hi ti a hia a hi (Gen 39:3). A lopi khawp mai hi. Hiziang maleh, a zi'n a them a, a kinepna a sukpitin piaklo zia in diklo tak in thiamlo chansak in a um a, a diklona hikeilo ah ngaw a umin Sungkul bang

a zut tamai hi. Zia hun ah Joseph chanchin apat ah thil lopi tak i mu'u chu "*Lalpa chu Joseph kiang in a um zel a*" ti hi a hi. Ama umpitu, a kiang ah um zing Lalpa chu a kingakna a hi. A ma â ding ah thamuantu leh a dikna taklangtu a hi bawh hi. Jail apat ah ladawktu in a mang a, zia hun chu a ngk ham ham ahi. Pathian ei umpitu hi haksatna, lungkhamna leh mangbatna mun ah i um lai leh hun haksa tak i tuak hun ah kingakna ah mat zing hi a haksa sek ngei e! Pathian zai ngak sang in mihing a kinep a



zing ingka tin, ama pakna chu ka kam in pawt zing in a. Aw Lalpa ei chawihawipi unla, a min chawihawi khawm hitiu. Lalpa'n... ka lau zosia lak apat ei hukdawk tai. Ama en zingten zachakna mel a puta pu'a hi. Zia migenthei hi a kiko ah, Lalpa'n a hia'n a lungdawnna zosia lak ah kipat in a hukdawk tai. Lalpa kichate chu a vansawlchak in a um kimvel hen, a hukhing sek hi. Lalpa laute chun taksap him him a nei puau hi.

Sakeibaknei vanglaite chu, tasam in a gil uh a kial sek hi, Lalpa hawlte vang chu thilpha a tasam ngai puau hi. Damsawt nuam a, a dam sunga thilpha mu zing nuam chu kua ahem? La lei gitlona lak in vengpha'n la, la muk chule thepna thu gen lo ding in huktup in, gitlona nusian la, thilpa bawl in, kichamna hawl in la a del in del in.

## 6. Mite simzing Kristian hinkhua : (2Kor. 3: 2)

Sawlchak Paul in "Nangmau hi ka lekha chu la hui; ka lung gil sung ua kizik, mi zosia het leh simchu la

hiu." Gingtute hi i umna i sep nau i zilnau leh i umna mun zosiau ah midangte ethak leh sim ah um zing i hui hi, Paul in Korinth kochuamte kiang ah a gen hi tuni ei uh khang ahin le a dik zing ahi.

Bartimai mitthumpa kha Lalpa Jesu a hun zui kha mipi zosia'n a muu ah, ama zia in Pathian a chawihawi uh a hi kha. Zia gualma chun simtu dawitak tuni la hindan miten a sim/ a mu nau apat in Pathian a chawihawi thei nau em ti hi i ki etchet na ding ua pawimaw tak a hi. Tulai a hin kam sung bep ah Pathian chawihawi, hin dan ah Pathian gam lat mi a tam ta, Gingtute hin chu kam bep hilo in nisin hindan in midangte kiang ah chanchinpha gen hi a pawimaw pen ahi.

Kum sin Khriamas ah i ngai thak zing "*Mari in ka hinna hin Lalpa a chawihawi a, Ka thagau le ka Hukdampa Pathian a chun a kipak ma ma hi*" a tia (Lk.1: 47). Zia la a hun sak daw theina hi Lalpa ti gual gual ah a chung ah tung ding ah a kipiak zia ahi.



a mamaw a piathehi hi ti a gingcha, Lalpa keng bul ah puitung in a um ah, Lalpa'n mu theina a piata a hi. Amu ma a khan Lalpa bang gual ahi em ti le hiapuan tin. Himaleh a aw a hia, a ginchak gual ah a muthei phat in zui tak Lalpa a hi ti hia in thupha selo in Lalpa nung a zui ngal ta a hi.

#### 4. Lalpa Jesu nung zui a lûl/ mantam dan :

Peter chun ngaitiam in kei uh hin bangkim nusia in ka hun zui ua, atia. Ama chun a kiang un, timatakin ka hil la hiu. Pathian gam ziaka, a in ahem, a ji ahem, a chate ahem nusiate. Tu hun ma ma ah, a le tamtak tawh a hung tung ding kumtuang hinna mulo ding kuama a um puai. Bartimai inle Lalpa Jesu a mu chian phat in a nung a zui ngala. Lalpa Jesu'n *"kuanle ei zui a nawp chun, ama leh ama, kihemilin, nisin a khraws pu'n ei zui hen"* (Lk. 9: 23) a ti. Bartimai hin bang chan a zui ahem tivang Bible ah i mu pua ah, himaleh Lalpa a zui ah, "Pathian a chawihawi a" atia.

Thuthung lui lam ah Pathian zui ahilo leh kitawnpi

Enok kha thina tep lo in Pathian in van ah a pui a. Joseph kha Potiphar insung ah taksa nawpna a zamsan ziak in, suangkul ah khum in a um ah. Himaleh Pathian in suangkul a pat Aigupta gam pumpi thuneina sang pen chang in, anu leh pate leh gilkiel ah thiding tam tak a huk dawk hi. Danial leh a lawiten meipi sung leh Sakeibaknei kul sung in Lalpa a chawihawi u'i.

Thuthung thak lam in nungzui Peter in suangkul sung ah Pathian lopina leh thilhitheina a puang lang hi (Nasepte 12: 1- 17). Tukum thak ahin a mithiangtho chia masate gualin ginum tak ah Lalpa tawh nisin ah kitawn zing ding in i lungthim uh kawi det hi tiu.

#### 5. Lalpa chawihawi hi gingtute kin a hi :

Bartimai mitthum pa'n khua a hun mu thei phat in Lalpa nung a zui ngal ah, a hinnan Lalpa a chawihawi a hi. Leng David in Bangtik lai inle Lalpa chu chawihawi



bailam khawp mai a, mihing ah kingak i ching nuam ma ma sek u'i. *"Mihing muang ah, mihing hanta kisanpi ah, a lungthim ah lapa nusiate chu hansia dawng in um uh hen"* (Jer 17:5) ti i mu'u hi. Mihing ah kingaka, ei lam ah pang ding hawl hi bailam tak a hi. Lalpa chu i kiang ua um zing leh panpitu a hi zing ngal a.

Juda tangval Sadraka, Mesaka, Abednegoa-te meipi sung ah a um lai ua umpitu chu Pathian a hi. Sakeibaknei kul sung ah Daniel umpuitu kha Pathian ahi. Ei umpitu pathian hi hechian tave leu hin chu thaphang in um mai puai ti'u. Haksatna mun ah a mite umpitu Pathian chun khawitak mun inle a mite a thatham ngai pua, i haksatna'u ei hiatpi ah, ei panpi in ei thamuum a, i buainate'u a sukkian piak sek hi.

**2. Ei umpitu Pathian chu haksat lai ah ei panpitu nai zing ahi:** Sam ziktun chun i Pathian uh hi mangbat lai ah

le panpi vak zing naicha um a hi dan a hechian ma ma ah, *"Pathian chu I kihumbitnau leh hatnau, mangbat lai ah panpitu nai zing ahi"* tiin La lopi tak a phuak hi. Ginchak thu ah a gen mai a hi pua, a tak ah, a hinkhua ah a tuak ngei a genzaw a hi.

David in Saul tha ding lau kawm kawm ah a tai lai in inle a hukdam theitu chu Pathian ahi ti a hechian ma ma, zia la hi a puak ta a hi.

Hana in cha a nei theilo ziak in a lungngai ma ma a, Lalpa kiangin a pauchap ta, thasia tak a kap ta ahi. Hana mangbat ka aw chu Lapan a la he ta, nau a hun vawp a, a hung hing ta, a minin Samuel a phuak ta ahi (I Sam 1:20). Hana hinkhua a hin Pathian chu panpitu nai zing a hi dan a kilang chian ma ma hi.

Hezekia chu thi ding khawp hial in a damlo ta, a lungkham ma ma ta. Isai chun, *"La inkuan sutup in, thi ding la hi tai"* (II Lengte 20:1) tiin a hil ta. Hezekia chu a lunggim



zaw diak a, bâng lam nga'n a pauchap ta. Zia phet a chun, lungkham lai ah panpi vak zing Lalpa chun a kê aw chu a la he ta, Hezekia dam kum chu kum 15 in a belap piak ta ahi. Mangbat hun ah ko thei Pathian, lungthim kisik ah ama lam zuan kitte kilepsan ngailo Pathian, I mamaw hun ah i kona aw hia ah, panpi vak zing thei Pathian i nei u'i ti hemail puai ti'u.

**3. I Pathian uh hi mi zosia ko thei a hi dan leh ko phak ah um zing Pathian ahi:** Mosi ko phak ah um Pathian a hia, Israel mipite Tuipisan gei ah lungngai tak ah a umlai ua le ko phak zing Pathian a hi. Thalek ah tui dawn ding neilo ah dangchak leh basam tak ah a umlai ua le ko phak ah um zing Pathian ahi. A gitlo zia ua Pathian a suklungnat lai un le Pathian chu ko phak in a um zing a, a kê thawm uh a hia a hi.

Zia gual ma chun Samson, Pathian mihat chu nungak zia ah sukgenthaina

tawpkhawk a tuak lai inle Pathian chu ko phak a hi. Ging lo miten nasa tak ah a sukgenthei ua, a hanta zosia a bei nung inle Pathian a ko kit ah, a kona aw chu ngaithak piak in a um a, Philistian-te chu a thichilpi ta, "*Chutichun, a damlai ah a thalup sangin a thichilpi mipite chu a tam zaw'u*" (Vai. 16:30) tiin Bible in ei hil hi. Migilo pen ah i hiat, thiamlo chang ding ah ngai ten le a ko zing thei ua, ko phak ah um zing Pathian a hi zia in lungthim leh titakzet ah i ko chun bangtik laiin le ko phak zing ahi.

Pathian chu ei umpitu, haksatna mun ah le ei thatham ngailo a hi. Mangbat lai ah le panpitu nai zing ahi ti hia in, a kiang in kitulut zing hi ti'u. '*Kei kumkhu'a'n khawvel tawp thiang inle la kiang un um zing ding ka hi*' titu Lal Jesu kha, i kiang ua um *Immanuel* a hi ngal a.



kietchian zing uh a ngai hi. Tulai ah thil khawktak chu mani hi ding sang a midangte hi ding he ah manlo gen ah hotel vel mun khen khat ah holim mai mai. I Bible in bangkim la nek un le la dawn un le la hi tapo uh Pathian lopina ding bep in hi un (1 Kor. 10: 31) ei tin gal a.

Chuleh Pathian in suantu bul ding ah a guat Adam leh Evi te khan Pathian in a nek lo ding ua a hil thei a nek phat uh khan a lungthim uh buai in Pathian le mu ngam lo in a kisel uh ahi kha, "*Pathian in Adam Khawi ah la um tam tin ako ah*" (Thilsiam Thu 3: 9). Lalpa pawm tak lo nek leh dawn sep leh bawl te hin chawldamna ei pia pua, thawmhauna leh lung zinna ei tut zaw a hi.

### 2. Pathian ah ginna dettak leh muan ngamna.

Bartimai khaw mutheilo in a dam sung hun bang chan ahem a mat nung in Lalpa Jesu'n a musak thei hi ti ginna tak tak a nei ah. Mipiten thip hiat hiat ding in vau maleu a ki ha ko zaw diak ah, Lalpa Jesu'n a nung zuite ama kiang ah hunpui ding in

thu a pia, ahun pui tau ah. Lalpa kengbula, *Jesu'n bang hun bawl piak leng la nuam emi a tia, Lalpa Jesu'n la ginna hi la dampi a hi a tia* (ch. 42). Simtu dawitak tuni hin bang ahi em Lalpa Jesu'n a hun bawl piak ding ah la daw? Ki ngaitua pha'n. I Lalpau Jesu hi zani, tuni leh kumtuang tiang ah a hepina leh thilhitheina chuai ngailo, la mamaw zosia neitu leh pethei tu a hi. Thagau lam dam lo la hi em? Ama'n a hun ngak zing hi. Kuale ama ah ginna diktak nei ah a ma lam zuante kuama a thawm in a kile kitsak ngai puai. Sawlchak Paul in "*Ginna ah chun la um nau em ti nangmau ngei kipatep sek unla, ki-enchian un. Ahiloleh, nangmau ah chun Khrista a um hi ti la kibiachian puau ah ahem?*" (2 Kor. 13: 5) a ti.

### 3. Bartimai in Lalpa apat damna a chang ta'i

Bartimai mitthum hin hinkhua genthei leh haksa tak ah mang ah, lampâm ah khutdaw hinkhua mang pa'n Lalpa Jesu apat damna mu theina a chan hi a lopi ngei ! Bang zia ah zia gual damna hi chang ahem i tileh, ama leh ma a kingaikhawk ah, Lalpa'n



## TU KUM 2019 AHIN LALPA'N BANG HUN HIPIAK LEH LA NUAM EM?

(Mt. 20:32; Mk. 10: 51; Lk. 18: 41)

~ Rev. Khupneithang  
i/c B. Phainuam Pastor Bial

Chanchinpha Mathai zia ah mitthum pani i muu a, Marka leh Luka zia ah Bartimai Timai chapa i muu a, amaute hi khaw muthei lo khut daw ah lam pam ah chu ahia a, Lalpa Jesu Jeriko lam zuana chia mipiten a nung a zui ua, a thawm git uh ahia in bang thu ahem tia kan hitiu in. Nazareth Jesu David chapa ei lungsiat in tin a hung kiko ah, mipiten thip ding in a vau ua, himaleh a kihako zaw diak a, Lalpa Jesu'n ahia phat in ama kiang ah hun pui ding in thu apia, a hun pui phat un "Bang hun hi piak leng la nuam em?" a tia, Bartimai in mu thei ka nuam hi a tia, Jesu'n mu theitan la ginna la dampi ahi a tia. Chun thakhat in khua ahun mu thei ta, ama chu a hun zui a, Pathian a Chawihawi a, mipi zosia chun zia chu a muu a, Pathian a chawihawi chiat tau hi" (Lk. 18: 36- 43). Ni leh tha kumte hung kihei zel in, Lalpa zangaina zia bep in Inkuan tam tak sung kim lo kum in a kiheiliam kitta, nangma leh la Insungkuante sung kim ah kum thak a hun pui tung kit ahin, lunggil tak in kingaitua pha tia, Lalpa'n bang hun hi piak leh la nuam em?

Bartimai mitthum pahin ama hina a kihe chian ah, chuleh Lalpa Jesu'n ama mamaw pethei a hi ti ataksanga. A umna lampi khatvei Lalpa'n a haw kha a hinna leh damsung ah ding thil lopi tak mu daw na'n a mang hi.

### 1. Mani dinmun leh hina kihechian

Tulai gingu tam takte

haw hi mani dinmun leh a hina kihe pha ta lo hi leu hi a kilawm hi. I Khriamas matnawp dan teu, i kum thak matnawp dan teu haw hi, Lalpa pawm tak ah mang i hinau em, chuleh nisin ah i lunggel uh le hi duthusam teu haw hi a hi gual tak in hung tung zel leh Lalpa lopina ding leh chawihawi na ding ahi na diam ti haw hi gun tak ah i



## CHIBAI BÛK

Changtel : Mathai 2:11; Luka 1:28, 40-45

~ Rev. K. Jama Vaiphei  
i/c Leilon Pastor Bial

Tukum (2018) Khristmas di tawh kisai in Editor pa'n 'Chibai Bûk' ti thupi mang in article hun zik in a ti'a kipak um kasa, kenle kipak tak leh ngaikhawk tak in ka hun zik a hi.

'Chibai Bûk' ti hi ei hawn le i chin ma mau a hi'a, thil hiatthiam hak a hi pua'i. Chibai genlo, 'mangpha' kithak ching namte i hi'u. Mi pani kikhen di a hem, tampi kikhen di i hi'u em i hi phatleh le mangpha i kithak sek ua, a umlo chanau leh lawi leh pai dang te le mangpha i thawt sek ua, la nu mangpha ka thak hi aw i kiti'u a, chia di ten le a man le hun thak venti i ti sek u'i.

CHIBAI BÛK i ti hi Bible ah le mun tamtak in a um a, himaleh Thuthung thak ah a kimute leh a diak ah Lalpa Jesu pian tuam ah Chibai kibûk nate ngaitua khawm di i hi'u. Kenle pauchap kawm ah ka zik a hi'a, a sim te'n le lungthim a pauchap kawm ah i sim ua leh lawkpi ngei hiti'u ti ka gingchai.

Bible thiam te chun Chibai Bûk ti hi chi guk in a khen ua:

**1. Lekhathawt a chibai bûkna:** Zia hi sawlchak Paul in le a ha mat hi ti i hiau. A mi leh mi kimaitua lo ah Chibai kibûk na a

hi. Malai a Greek ten le a ching ma ma u'i a kiti'i.

**2. Gun tak a zana thupi tak tawh Chibai Bûkna:** Zia hi Lengte haw a khua leh tui ten chibai a bûk dan uh a hi.

**3. Ki entua a Chibai kibûk:** Khut kitutua a hem, khutmuk leh khutmuk situa a hem ah chibai kibûk dan a hi. Zia gual chibai bûkna hi Lalpa Jesu Khraws lek ah a um a khan le 'Chibai' nang Judate Lengpa ti in chibai bûk na lem, enghona chibai bûk pawlte a um u'i. Hebraite/ Judate kichibai bûkna le



zia hin a pang a, 'Shalom' a hem 'Salaam' a hem kiti tua a 'chamna, malzawl'na' kigen khum tua chu Judate Arabte chibai kibûk dan a hi.

4. Khawvel gam lailung te kichibai bûkna chikhat chu pawsal te biang leh biang sittua le a hi. Zia chu Juda ten 'Nâsak' a tiu a, greek ten 'Philema' a tiu.

5. Ngaina tak ah: Mukno leh mukno situa a chibai kibûk le a um kit u'i. Lawi leh pai leh Inkuan sawtpi pi kimu talo hung kimutua, a zat a kizat thaw pawl le a um u'i.

6. A tawpna pen a chun, Juda Isakariot in Lal Jesu a chibai buk dan ha a hi. Zia hi 'Dawha bawl'na' chibai a kiti'i.

Tuchung ah 'Chibai Bûkna' i gen nawp pen di chu Panina, Pathumna leh Pagukna hi di a hi.

1) Pathumna hi vansawlchak in Mari a nauwawp di thu a va hillai a, 'chibai, nang Pathian guatchuam' a vati nate, nau a vawp nung ah, a suapi nu Elizabeth a va ve lai ah Mary leh Elizabeth chibai kibûk dan te kha hin a.

2) I gennawp thupi pen chu chibai bûkna chini na Zâtak leh gun tak ah chibai bûkna hi a hi. Zia gual chibai bûkna hi Lalpa Jesu nausen a mu phat ua mipil ten chibai a bûk dan uh kha a hi. Zâna chibai a bûk bep uh hilo in, chibai bûkna thilpiak le a piau ti a hi kha. A thilpiak teu kha chu kumsin a i gen uh a hia, mulo a genthei ngen hi'i tiu. Jesu hina (a dinmun) leh a nasep di etsakna a hi ti i hiatsa' u a hi.

a) **Sana:** Lei leh van siamtu Lalpen, kumtuang Pathian, Lalchutpha vâm a, thîkhtiang ah vaihawm di a hina a etsak hi.

b) **Begaw(Gimtui):** Begaw hin hin Thiampu, Melkhizedek gual ah, bul leh tawp neilo thiampu, a ma thisan a, mihingte a dingah kithawina a lat na di, 'Zia ka taksa nang uh â ding ah piak chua a hi' ti tu ding a hina leh zia 'no hi ka thisan a thuthung thak chu a hi' ti tu ding a hi nate a etsak hi. Thiampu a hina (Hebrai 4:14-16, 5:1-10) a ma thisan ngei ah



ching laiin lunggil takin a la hepi thei ah. Pathian kona aw a hiat hun in, *Lalpa lei pui dan dan in a la ti thei zia k a hi!* A gasua chu bang ahem iti leh, a thi tiang in Lalpa Pathian a puipa leh a kumtuang ah a Pathian a hina a kilang nasa mama ziang a hi.

I zillai ding u chu a hi leh – a dawitêlna panglo ah Lalpa Pathian in Patrick a la puihuai ah. Ahin, a tawp in Pathian puihuaina leh kona chu ama dawitêl na a hung suak a hi. Zia chun Lalpa'n a lopina a sulang ah, Patrick nasepna lopitak mai in a malzawl a hi. Ei un le Kum thak i lut ding ua hin, ei ma dawitêlna hilo ah Lalpa'n ei puihuai a hi leh le thunuaigawl, kingainiam leh sekdo tak ah Pathian puihuainal ampi chu zui ham ham ding in i ki chial uh a hi. Jerusalem kulsung ah umte Pathian in a lopina leh thilhitheina a musak gual in ei uh le ei musak ngei ding a hi. Hebrai pau ah Sam 48:14 kizik kha a thil tuak uh tawh temat ah i ledawk ahi chun –

*Zia gual chu abi Pathian chu, kumtuang leh tawpni nei lo ah i Pathian ding uh chu abi. I thi tiang un i chung un aman ei kaibat leh puihuai ding a hi.*

Ziagual ah Pathian lopina leh khawtuana testimony Bible ah imu uhi a thupi in kinepna leh ginna a sulian mama hi. Israelte a la puitu muan um Lalpa Pathian chu ahia. *Tuni hin le ei un ama bangkim ah muang ngam in Lalpa pui dan dan in ti leu hin a lopina, hatna, hepina leh thilhitheina ei musak ngei ding a hi. Kum thak 2019 i thillawk ua pat hin (leh i mat ua hin) zia Pathian thu hi pansan in Kum thak lut hitiu in, Lalpa kei leh ka innsung mite, khuasung leh Kochuam lei pui dan dan in aw ti thupukna ala la masa thei leu hin Lalpa Pathian lopina, hepina leh thil hitheina chu thupi tak ah muding ihuu.* Lalpa'n simtute zosia Kum thak in a lopina leh khawtuana mu ngei ding in ei malzawl ta hen!



mu. Chawmlo in mi tam pi ka aw gin, “Lungsiat tak in ka lak un hung um kit in” ti a hun hia. Bangcheng bawl ma leh Irishte chu a lungthim in a kawimang thei ta pua. Zia a mumang hi a hung kilang zing ah. A tawp in zia chu zawm ding in a hinna a kilân ta. Chawmlo kal in Lal na sem ding in kisingsakna mun in a min a khumlut ta. Thiampu leh Bishop tiang ah *ordination* piak a hun hita. Tangval cha a hi in Ireland gam ah missionary hiat lak ah a masapen ding in a kuandawk ta a hi. Kum kihei chawmlo kal in Irish te’n Khristian sakhua chu a hun pawm tau a hi. A thi hun in Ireland gam pumpi Khristian a hi suak vek phial uh a hi. Zia bep chu hilo in, suak ah sumkawl veina (*slave trade*) haisan ahia, Ireland gamsung ah nam leh nam kal ah kidona nasatak in a kiam hi.

Patrick nasep daw thupipen khat chu Tumlam Gam (*Western Civilisation*) hukdaw hi ahi ati hial uh a hi. Galhangsan thingtangmite’n

(*Barbarians*) Rom Lenggam a nuai chimit ua khan kum zabi bangzat hem lekha thiam nalam ah nasep zosia (*great literary works*) phial kha mei ah haltum in a um hi. Ahin Latin lekhabu haw ki teisawn leh kepbit na munkhat ala um ah – Ireland mun chuam chuam ah monastery chu a hi. Patrick in Pathian nasepna ding ah kiziltinna ding ah Ireland mun tamtak ah monastery a la tundaw haw kha ala hi. Europe gam Hun Thim (*Dark Ages*) apat a hung pawtdaw hun in Ireland gam ah monastery um zosia chu belcha in lekha zil nalam in a hun kipan thak kit uh ahi. [Reported in Thomas Cahill, *How the Irish Saved Civilization* (Hodder, 1995)].

Zia gual ah Pathian lenggam a ding ah thil lopitak mai Patrick hinkhua a hung piang daw thei ziak chu a kipatna bul pen ahi leh mumang (*Pathian apat vision*) a la ngaithâk leh zawp ziak a hi. Zia chun a etsak chu bang ahem iti leh, Patrick hin Lalpa a Pathian hi belâm a la



kithawina a siam a, ei tan di a hina a etsak hi. (heb. 9:12-22; 10:10-18). Jesu tatna makna chu zia hi a hi. Khawvel ah thuthung lui thiampute gual ah, a vel a vel ah, midangte â ding ah kithawina siampiakna, ama â ding a le kithawi sek te gual kha eipua, Malai thiampute khan kelte, belamte, bawngla te thisan a lan ua Lalpa Jesu’n vang i) Khatvei a bawl leh vel bawl kit a ngai puai. ii) A ma â ding ah kithawina a kibawl le a ngai diakpuai, a ziak chuh, gitlona neilo a hi ziak in. iii) Gan thisan hilo in ama (Pathian Chapa) thisan buak kailo (without blemish) chu a lan a hi.

**c) Murra:** Murra chu thil kha, thil kawisawt theina dinga zutna a hi. Lalpa Jesu’n haksatna a thawkna ding etsakna leh ama ginga a hinkhua piadawkte leh ama kipiadawktu a ding ale a phatnate a kawk hi.

**3) Lepthepna chibai bûkna (Decietful salute or greetings)-** Herod in mipil te kiang a, “chiau inla, nausen chu gunchu tak in hun hawldawk unla,

la mu phat ua leh ei hun hil un, keiman le a ma chu chibai ka bûk theina ding in” a tia (Mathai 2:8) a ti gual ngei in a hun di hisap tuak in Bethlehem leh a kimvel ah nau kumni nuailam sia chu a that chimit tai (Mathai 2:16-18). Bible a genzawm na umlo maleh Lalpa Jesu thasang ah zia kum a naupang Herod in a tha zosia hile Pathian ngai in Martar a hi nau hi Lultak hidin ginchak um kasai. Zia chule jawlnei Jeremia mang ah Lalpa genlawk sa guitung a hi. (Jeremia 31:15). Herod ban a zia gual a Lalpa Jesu chibai bûktu dang khat chu Juda Iscariot kha a hi. Kochuam din til lai a pat Kochuam dodal a Khristian te sawisa leh tamtak that tute zosia leh tuni tiang ah do tute hi Herod tawh pangkhawm a hi mai u’i. Sawlchak Paul khale chawmkhat tak chu Herod lam in a panga, Damascus daikiang a khan Hepina dim Lal Jesu’n a malam a pang din a thuzaw tai.

Kum tamtak Khristmas i hun mang to tau a, inlam limna leh kipakna thupitak



tawh luaithena thupi tak tak te i bawl ua, Kochuam khenkhat ten gamthak nasepna din i nei i lam teu i la piau a, luaithena ding ah i tuak teu, gamthak â ding ah i tuak teu hi nausen Jesu chibai bûkna a la hi zing hi.

Assam leh Arunachal a i Kochuam teu haw le, Joint Pastorate khawmpi a mangthei tau a, kum bangzat a hem zaw leh Assam Synod, Arunachal Synod i khang ua i melmu ngei uh le kinep a um hi. Burma (Myanmar) gam ah i Kochuam teu in le a mau kham kham a thawlawm office ah Bial thum a pat thasin a hun sunglut thei tau a, malai British te khang a Missionary ten *“Burmese pakhat Pathian awisak sang in sakeibaknei kam sung ah sa bak umsa lakdaw kit bailam zawn a”* a la ti hial uh himaleh Buddhist thiampute U Kanbo, U Muang Muang leh midang dang ten Lal Jesu a hun pawm bep uh hilo in chanchinpha gentu a pang tau a hi. Malai Herod te kha Jesu Chibai bûk dan a kisang tai. Khristmas la phuak tu minthang Pu R. L. Kamlala in *“Leng Herod in a hiat in a lungzin pi a... a sepia*

hang a Kokhawm Judai gam a mi, Chibai bûkna huaisia pe dingin a kuan tau” a tia, zia ma chet a chun *“mipil te chibai bûk dan a genna a chun... “a go bawm teu hawng in chibai a bûk tau ve”* a ti gual in Herod a pang i hem, mipilte gual a nisin Jesu zui ah, i nei i lam, i lungthim, i hun leh phat le hi pumpi kipia Jesu chibai bûk pawl in i pang em? *“Lalpian ni kawl a liam nung”* ti phuaktu Pu Saidailova chun *“Khristmas ni a hung tun hin, Bethlehem ka ngai, mu ka nuam singkhual vangla vanlalcha hung piang chu a ti ban in a chang tawp nan “Lal Immanuel lawm ding in mipilte hung in, Go thilphate hun chawi in Immanuel ang a”* a ti gual in ei un le i nei i lam teu tawh Lal nausen chibai bûk hitiu. La phuaktu minthang, Pu Rokunga in *“I lungthim nat nateu paithan Khristmas mat guai'tiu”* a ti gualin lusunna, lunggimna dang dang ei sukha zosia ki hiatmil sakin lim tak leh nuam tak in Thagau leh Taksa'n Khristmas mang chiat hitiu.



khatau ah. Inlum nuam tak mai chu chên in Ireland khua khat ah Lal (*Chieftain*) suak in a pansak tau ah. Zia bep chu hilo in, belampu in le a pansak uh a hi. Ireland gam ah tanglak ah belâmpu hi ding chu a huphul um mama mai ah. Tha tamtak mitawh ki mulo ah tang vawt lak ah pau natiang le hiatlona gam ah gilkiak tak ah hinkhua mat chu mi lungsiat um tak hinkhua a hi.

Ziagual ah hinkhua genthei um a mat na in Pathian a bel khawlaw ta a hi. Ama pu hi Pastor a la hia, Patrick le a inkuan uh ginna lam in a hung kihei ta a hi. A hun haksa zosia sung in pauchap ngutngut in Pathian a la bel hi. Zia haw sung in thuktak ah Pathian lungsiat na a la nei in leh Pathian Thagau nasepna ama hinkhua in nasa tak in a la khang hi.

Kum 6 zaw ah suak ah mat ahi nung in nikhat mumang (*dream-vision*) a nei ta. A imut lai in aw khat ahia, *“La gilkialna chu lawmman piak ding la hi:*

*inlam ah chia ta ding la hi.”* Lamdang leh maksa in a chu to ah. Aw git chu a he nalai ah, *“En in la lawng (ship) chu a ki man ta'i.”* Patrick chu le thodawk in a kipan ngal mai ah. Mel 200 (*200 miles*) zaw in lawng umna pang chu a hung tung ta. Ahin lawng ah um haw chun suak taimang chu kuama'n a thulak puau ah. Lawng Captain pa chun le ki um hiat hiat ding in a gen ah. Ahin Patrick chun, ginna liantak nei in, zia lawng hi chula a hi ngal ah atia (a lungthim in). Hun chawmkhat pauchapna a mat kit sung in lawng a pang mi khat in amau tawh chuang thei ding in a hung gen ta.

Kum 2 sung lut ma leh a inlum Britain chu Patrick a tung kit ta. Kipak tak mai in a inkuanpate tawh a kimutua ua. Innsung mite chun amau nusia ngai him him talo ding in a thûm uh a hi. Ahin zan khat chu, Ireland gam ah a mi hiat pawsal khat, Victorious hi a mumang in a hun kilak ah. Victorious in lekthawt *“Irishte Aw” (The Voice of the Irish)* ti hi a khuta a chawi a





hi (Chang 4-7). Lau tak mai in a hung nalam mau in a melmau sepai hawn thahat leh hangsan takte chu zâm in a taimang kit tau a hi. Zia Sam hin Israelte, zia hunlai tak ah lim leh kipak tak ah hun a mat uh hi a suklat ahi. Zia thil lopi leh lamdang tak Jerusalem khopi ah tung chu tawh i Bible changtel uh chu i mekmat ding uh a hi. Zia hun lai tak a chun, “*Zia hi i Pathian uh, kumtuang, kumtuang ah i Pathian uh chu a hi. Ama kumtuang ah ei puipa ding chu a hi...*” ti hi khang um sawn zêl dingte in a hiat zing ding ua genlat ah a hung um hi.

***Lalpa pui dandan in*** ti thupi i matnau ahin, banggual in Lalpa Pathian in a mite leh a Kochuamte a puihuai sek em ti hi vak en masa hitiu. Pathian thu sut te’n Pathian in a tangpi in chi nga (5) in ei puihuai sek hi a tiu ah:

- 1) Pathianthu in (Bible mangchan)
- 2) Thagau Thiangtho in (*Holy Spirit*)
- 3) Pathian mithiangtho te mangcha in (*Counsel of the saints*)

4) Sia leh pha hiatna’n (*conscience and common reasoning*)

5) Hinkhua eima dawitêl hilo ah thil tungte’n (*providencelcircumstantial signs*).

Kum thak ah ei uh a ding in a pawimawh diak chu ahi leh a ngana hi a hi: ei ma doitel hilo ah i mimal, innsung leh Kochuam hinkhua thiltungte chung ah “Lalpa lei puihuai dan dan in ti thei leu hin” ti hi a hi! Synod Puitute, Pastorte leh Upate’n ei puihuai dan dan uhi Lalpa ei puihuai dan ahi i ti thei uh chun malsawmna lopitak dawng ding ihu.

Ei ma dawitel hilo i hinkhua thiltung lak ah Lalpa pui dan dan in tia lak dan thiam St. Patrick hinkhua hi a ettawn tak mama hi. Kum zabi 5na kihei tuam vela khan Rom Lenggam a puksia vang ta. A thunei nau a kiamsuk tak ziak in Britain gamgi tuam lak chu Irelandte suak ah sumdawng pawl in a va bulu sek ua. Kum 401 hun in, zia gual ah khua ava bulu nau a chun kum 16 mi Patrick hile a va man



## KHRISTMAS LUNGTHIM

- Upa Pauzalel, New Lamka Kochuam

*Zia lungthim Jesu Khrista ah um kha nangma ale um ta hen (Phillipi 2:5)*

### 1. Judate Messiah thildan

Anam uh hukdam na ding leh nam dangte nuaisia taka awp khum dingin, nam kiti chuamna leh kikhen chuamna gual in a chia piu a, nam dangte a dingin chanvo aum sak puau hi. Amau a ding bep in a ngai ui. David chapa ahi zia kin David gual a lopi tak leh thil hithei taka hung dingin athil ui.

Judate Messiah thildan leh Nazaret Jesu’n pianna mun ding ah, mun tawmpen ahun tel na hi aki sun pel talua, Israelte thawkna kala khawsa ahi zia kin Messiah lopitak leh thil hithei tak lo chu, athil thiam puau hi.

Bukim loin Messiah ahiaua, bukim loin athil ua, bukim loin a nasep ding ahiau a, bukim loin a dawn ua, ahung phatin a dawu puau a Khraws in akhen den uh ahi. Tuni tiangin ahe thiam nai puau hi.

### 2. Belâmpute

Belampute hi mi hausa leh lopi ahi puau hi ti ahiat thei a. Mi genthei in phatak ziang ale cheng phalo, Juda sel leh sang dan ziang le sel theilo khawpa phula Belam chinga

giak ahiua, Thagau thiangtho in, nam tin damna ding ah mun tawm pena ahung pian thu, apuan dawn na ding ah, mi thupite tel lo ah migenthei mimawl pen phula belam pute ahun tel zawk hi ngaitua kham ating ahi.

Mi niamte kiangin Pathian aki lak sek a, mi ki ngaitawmte chu Pathian tawh aki tawn khawm sek ua. Mi lungthim thiangtho te chu Pathian in hetthiam na ape sek ahi. Belampute hi nausen chibai buk masapen



leh Khristmas mang masapen ahiu. Mihing et in tawm maleu, Pathian et in alopi pen ahiu.

### 3. Judate Kut

Judate'n kutpi pasagi leh thathak kut tamtak a nei ua thupi takin mang sek ma leu, A matna lungthim uh Pathian in a dawilo ahi (Isai 1:11-16; Amos 5:21). Zia tak ahin bang ahem izil daw thei ding um. Kristian te kut thupipen pakhat Khristmas thupi tak in imang sek ua, I ngakla chiat uh ahi. Himaleh ilawp uh Lal Jesu ilak un a zalen na diam? Ahilo leh ilam zing lai un, idang chakdan uh hia'n ei ka khum kha diam? Kingaitua a ngai hi. A pawimaw pen chu Khristmas hi lungthim diktak pu'n imang nau em? Ti hihenla.

### 4. Kingaitawmna Lungthim

Khristmas hi Lal Jesu kingaitawmna ziaka, hung um ahi ziakin, lungthim ki ngai tawmte bep in Khristmas a mang fu thei hi. Lal Jesu kingaitawm dan ngaitua leu

hing Pathian chu mihing in ahung kisiam a, mun tawm pen in a hung piang a. Mihing chiat chiat ale, suak gual in ahung kisiam a, Suak chiat chiat ale thikhawp hiala suak thu awi in aki siam zel a, thina chiat chiat ale migilo pente thina mun Khraws ahun tel ahi. Lal chungnung penin mun nuainung pen ahun telna ziakin, vana mite, lei a mite, lei nuai a mite ama angin abawk khup uh ahi.

Zia ziak achun eima kilopi sak na lip tha veka keima ziak ahi ti ah, mi ki ngaitawm te'n Lalpa a chawihawi nau mun achun Khristmas atung sek ahi.

Eima hi iki ngaitawm thei ngaipua, Lal Jesu kingaitawmna chun I hinna a zaw ziakin iki ten ah a man ikun sek ahi. Zia guala mi kingaitawm te lungthim achun Khrista ahung kilaka Khristmas a tung ah mi chapote chu Khristmas tung ma leh a mau a dingin atung pua, mas bep atung hi.



## LALPA PUI DAN DAN IN

*Bible chang têt: Sam 48: 14*

*- Rev. Mangthianlal Thangniang  
Hill Town Kochuam*

Pathian mapui na zal in Kumthak 2019 thillawk thei tading in i um ua, kipak a um takzet a hi! Kum leh khuate a hung kihei phat leh, mihing lungthim hi ngaituana chuam chuam in ei chûm vel sek ah. A tangpi in lunghel leh thawmhauna lam in i dim sek uh a hi. Kum hung tung ding hin bang ei puak diam ti hi mihing in i thillawk pen uh khat a hi. Maban ah Synod muding kinem leh thanuam tak ah i thil zing lai tak ua hin, ei mimal, insung, Kochuam, khawtang leh Manipur Area hi Lalpa'n banggual in ei pui diam ti hi suangtuana lianpen khat a hi zing hi. Lunggil thawmhauna, huphulna, thatnawpna leh kinepna lak in zia Bible chang hi Kum thak ah i kingak nau hi leh ti hi dawisakna liantak tawh vak en khawm hitiu:

*“Zia hi I Pathian uh, kumtuang, kumtuang ah i Pathian uh chu a hi.  
Ama kumtuang ah ei puipa ding chu a hi..” (Sam 48: 14)*

Kum 2019 ah ni leh tha lungtung zel ding te ahin zia Bible chang ahin i ginnau leh lungthim i ngak thei uh ahi chun, Pathian ah thamuanna leh chawldamna suk ling thei lo nei ding ihu. Ziakachun, zia Bible chang pansan in i Kum thak sermon ding un “**Lalpa Pui Dan Dan In**” ti hi i têt uh a hi.

Sam 48 chungchang ahi leh gamdang mite'n Israelte do dingin Jerusalem kelkawt tiang a hung phau ah. A khawsung ah umte'n

lungdawng tak ah a thildan ua chun, melma te'n hun sawt tak gentheina tawh ei awpkhum innau ti hi ahia. Mihing suangtua dan in chu suachak nading lampi a um him him pua. Ahinlah, Lalpa'n thil lamdang tak ah nasem in melmate chu a buaizak uh a hi. Van sawlchakte'n Jerusalem umkimvel ahiu em a hiloleh Lalpa Pathian in banggual nasem ahem ti vang het ahi pua'i. Ahin, Pathian in a lopina thilmak chu bawl ahi ti vang a kichian



zawlona teu phak gua ah pan i lak thak na kum un mang hitiu. Bible chun nasemlo in ngawl hen a tia, Bible ziltilna gual ah hun awng nei manlo ah nasem gam te chu gam hausa leh gam changkang i ti teu a hi zêl u'i.

Kumthak sin leh kilan thak, lah phachuam zo tak tak lo la hi tak inle tukum

chu a la kilan thak zel in. La kilat hun ah phat la nawpna lungthim kha a hi Pathian in a daw chu. La pukna mun chu hezing inla, zia kipat thodawk in Jesu tawh khut kitu zing in chia tan. Thanthim sung lut masang ah van go ding a tam thei pen khawl in i damsung hun lultak chingthei tak a mang ding in 2019 kumbul a pat in pan lathak chiat hitiu.

## HIATSAKNA PAWIMAW

*Kum 2018 tawp lam i tung tau ah, ei puitu Lalpa chu pakin um ta hen! Hinna Vâk Editorial Board chun Kum dang banglo takin i magazine tha ni dan ah suak zêl sek kha thasin in a hung kisuak sak thei ta, kipak a um ma ma hi. Kum tawp lam ah hin Budget tawmcha mangcha ah ama leh ama kitodel ding ah kibawl a hi dungzui in Thingtang leh Phaigam ah Hinna Vâk latu zosiate'n Kum 2018 Fee Agent-te kiang ah ala sufel chiat dingin Editorial Board chun a hung kichial hi. Pathian mapuina leh umpina kinem in Kum 2019 Subscription Fee le hung sufel pai ding in le chial i hi bawk u'i. Chuleh a la thak nuamte â ding ah kawt hawn zing ahi. Lalpa'n hun umpi chiat ta hen.*

*-Editorial Board.*



## 5. Tulai Khawvel

Tulai khawvel ithil chun pilna leh thiamna asang deu deu a, I chapo deu deu ua, mani masialna alian deu deu, kingaitawm na lam ah iki nung tawl deu deu uh abang hi. Chapona leh itsikna hi Kochuam melma lianpen ahi. Alang lang in gen tale hing, Pathian Kochuamte kihothailo sek na hile chapona leh itsikna zia ahi pen hi. Thunei nawp takluat na hin seppite a suna sek hi. (Eph. 6:10-12)

Khrista ilawp uhi chu, lei leh vana Lalpen himaleh mun tawmpen teltu ahia, ziaziak achun Khristmas hi ingaitua chun zia lungthim Jesu Khrista um kha nangma ale umta hen, tithu hi apawimaw zia he thei hitiu.

## 6. Kichamna Lunthim

Khawvel su haksa pen khat chu kichamlo na hi ahi. Inkuan kichamlo na in, Insung nuam hindan pha ding zosia a suse vek ahi.

Insak inthang kichamlo na in khawvel a suneu a, khawtang kigensiat neu neu na in, hinkhua a zalen thei puai. Kochuam nasep khawmna zianga hinle lungthim kipawlet lo chu khan maw na ahi. Anasep khawm pite gen selo ma le hing le igen phat nawplo chun, eima ki etchian a ngai hi.

## 7. Khraws

Khraws in a sawi nem zolo thinlung achun itsikna a ipmu zing seka, itsik ding amu dungzui in ahung khanglo sek hi. Chapa taimang U chanchin ate (Lk. 15:28). David in Goliath atha chungah Lal Saul leh David chanchin ate imu thei ahi (I Samuel 18:6-9).

I gen nawppen uchu Khristmas lungthim chu chamna ahi ti ahia. Lal chungnung pen in mun tawm pen ahun tel zan akhan, van lapawl te chun lei chung ah kipak ma ma mihiamte chungam chamna thu leng hen tin lathak hawi tak mai ahun



sau ahi. Chutichun khawvela mipil pen khawsak mipilte leh mawlpn belampute'n dawidan leh tupdan kibang in, gan kuang ahun zuan khawm ua. Zia guala mipil pente leh mawl pente kilung gualna mun a chun Khristmas atung sek hi.

Khristmas thu cha chu chamna thucha ahia kicham nuam taphawtin Khristmas a mang ding uh ahi. Miten ei kicham pilo ahi thei a, Khristmas imat ding chun, eima bek in ei champi lote chu icham pi ding ahi. Midang champi theilo tu eima ahin abek zinga zia chu zaw masak ding ahi. (Rom 12:21 ; 8:13).

## 8. Kipakna Lungthim

Vansawlchak chun belampute kiangin, lau ki unla nagi tiam un, mizosia a ding ah chanchin pha kipak um kahun tun ahi ti in lei mite ahun hila (Lk 2:10) Mihingte hin thu kipak um ihiat lak lak un, zia thu hi akipak um pen hina, DL Moody inle kathil hiatte laka chun chanchin pha

hi ahawi pen hi tin a gena. Chanchinpha Bethlehem ah ahung kilang a, Kumtuanga thi dingte a dinga hinna thu ahia, Gitlona suaka tang zingte a dinga suakpawtna dak ahi.

Tuhin mitamtak chu I taksa hisel lo ziak ahem, genthei na ziak ahem, bangziak ahem in ikipak zing theilo ahi maitheia. Himaleh, ilungthim gobawmte hawng ah Lal chibai ibuk phawt uchun, haksatna kala kipak na hui chim ahunghang ding ahi. Zia hun thupi tak ahin Setan lau pen chu, lungthim kipak taka Khristmas imat ding uhi ahi. Khristmas lungthim iput uh a dawi puai. Lungthim dang putsak ei gua ahi. Khristmas lungthim pu zing hitiu. Lalpa'n athu malzawl ta hen.



sung ah dawitêlna hun i nei naklai ziak in mi vangpha i hi'u. Kisiam phatna ding hun thak Pathian in ei piak naklai te hi mang phachuam hi tiu.

Kum kihei in a hung thak zel a, i hun matsa teu zosia i matdan pha leh phalo te a hi gual gual in vanlam record a chun tepte a la hita, tu ah kumthak i mat ding pen hi bangma teptena um nailo, lekha puan vam kizik nailo gual a hi. Banggual ah vanlam record ah tepte a hi diam ti phatak ah ngaichang zing pum ah mat a kul hi. Pen tui san a hilo leh vawm te ah zik pawl bial bual a hi lona ding in pilvang hi tiu. Tulai i gam boruak leh thuleng te le a pha tapua, banggual siatna hung tung leh le i bit theina ding ah Pathian bêl ah a ma tawh kizawp mat zing a kul hi. Zia gual ah ama bêl ah ama tawh kizawp mat zing ding ah thutiam bawl in kilan thak hi tiu. Lal Jesu'n i thinlung a hung lua theina ding ah i lunggil kawtkhak kisungkam chu a hawngtu ding ei ma zawk i hi. I lunggil ah a ma i chensak a, Lal vaihawmtu ah i pansak nak chun banggual buaina lak inle bit zêl ding i hui. I do teu hi sa leh thisan

a hi puau a, vanmun ah thagau gilo umte haw a hi ziak un Pathian galvan bukim ah kithuam zing pum in, kumthak hun mangto hi tiu. Insung maicham siam ah i chateu etkawl phatna kum in mang hitiu. I ginchak phaklo ua i chateu setan pawl ah a la pang bangle hi thei a hui.

Kumthak hi taksa a ding ah i khawsak nau lamkai ah kietthakna ah le mat ding a hi. I sum hawlina teu, i thiamzilna teu leh a dang dang ah le i bawlphat zawlo nateu a pat pan thak lakna ding hun a hi. I nisin hun matdan teu hi midangte gual ah dinmun phazaw lua thei ding ah nasem i hi nau em? A hilo leh eimau nek di khawp le lawdawk lo ah hun mang thap mai ma ii hui em? Martin Luther chun *"Jesu hung kit talo ding gual in kikhual inla, zing ah Jesu hung kit ding gual in kiman san um in"* a la ti hi a pawimaw ma ma hi. Lei ah a Crore ah sim paisa leh go nei leu hin le van khawpi lut san ding ah chu thakla umlo a hi. Mite gual ah nei le tup ah sep ding, tampi nusia in van khawpi lutsan leu hin le khawklo a hi. Zillai ten le mi i phak



## KUMTHAK THUCHA

~ Rev. S. Khaikholam  
i/c Kangvai Pastor Bial

A mawl pen in le i vak hiatthei chu i chung ah Nisa khi kitawl zêl in simlam kai a va phaktawp ni a um a, zia chu December 22 ni a hi sek hi. Zia kipat mallam ah hung kitawl zêl in mallam ah a phaktawp ni chu June 21 ni a hi kit hi. Zia kipat hung kilekit a simlam kai a phaktawp ni a hung tung kit hun sung chu kum 1, zia chu ni 365 sung a hi sek hi. Zia kum 1 hun sung hi tha, ni, dak, minute, second ten a hung kikhen sawn a, lemchang zawkna ding in January 1 a pat ni a hung kisim to hi. Nisa kitawl tak tak vang a hi pua, lei hi nisa kimvel ah a chia zia ah nisa kitawl gual ah kihia a hi zawi.

Zia gual ah kichawl lo ah i pian ni a kipat hung kitawl zing in i tawp ni ding i naito zel uh a hi. Mihing dam kum kum 70, hatna zia ah kum 80 hithei bep a hi chun a kallak ah accident tuaklo leu hin le tam tak te chu i tawpna ni ding uh i nai ma ma tau hi. Thanthim sung lut pi lengla sakit thei ta lo ding i hi zia ah un dip dap le a um ziang hi. Eima utle utlo thu hi lo in hun hin zia thanthim sung ah hun tawllut tei ding lah a hi ngal a. Zia zia ah chun i damsung kum 70/80 vel hi tawh kumtuang hun sawt dan kikhiakna hi le ngaitua chian a pawimaw hi. Tawpni neilo kumtuang hun genchianna ah kigen sekte lak ah mawl tak

hingal, hiatthiam bailam pen chu- i biakin tia uh suangpi 1 chu vachim khatin kumkhat ah khatvei hung leng veng veng ah a muk a hung tat zel ding, zia gual ah kumsin ah a hung bawl ah suangpi chu vachim muk in a get bei phat leh kumtuang hun chu a bul kipan gual bep hi ding ti a hi. Tawpni beini umlo a hi mai a, damsung kum 70/80 vel tawh a kikhiak dan chu tê gual le a hi pua'i. Ahileh zia hun sung sia chu Lalpa kipakna ah lut a chawihawina lallukhuk tawh Lalpa pak ah um mai ding tawh zia hun sung sia thiamlo changah gawtmun meidil ah um mai ding chu vak gel kit tiam u. Zia i damsung hun chawmcha i nei naklai te



## JESU MIHINGA AHUNG PIANNA ZIAK

Rev. Gintinthang  
i/c New Lamka Pastor Bial

Thil kisiam leh hung piangte him him hi matna ding leh hina nei dinga Pathian in a la siam him ahi. Pathian in Adam a siam a kha'n, Eden huan enkawl dingin a kawi ah, nitak lam ni nem hun in a vetha sek hi. Adam kiang in thupiak a pia "Huana thingga zosia la nawp nawp la nethei hi. Ahinlah, a sia leh a pha hiatna thingga pen hi la nek ding ahi puai, la nek ni ni'n thi ding la hi" ti'n thu a pe tai.

Pathian ti lo gual tak ah thingga ne'n Pathian tawh kizawpna tan in taksa leh thagau ah thina a hun tuak ta'i. Zia pat hin Pathian a pat khendan in, Pathian tawh mihing kizawp kit theina dingin Pathian in a chapa Jesu Khrista khovel in a hung piansak ah, zia a hung piansakna ziate chu tuni'n tamlo in ngaitua khawm hitiu. Zia te chu:

### 1. Mangthaite hawla hukdam dingin (Luka 19:10) :

Pathian in a hinna a piakte manthai ding a dawilo zia in mihingte hukdamna dingin a chapa Jesu khovela mihing gual in a hun piansak hi. Zia

hukdamna na sem ding in midang a umlo zia kin Pathian in a chapa chu mangthaite'n hukdamna a neitheina ding un mihing in a hung piansak ta ahi. Hukdampa hun piang lo hileh kumtuang ah mangthai mai ding mihing i hi'u. Mangthai dinga Pathian in ei dawilo ahi ti ngaitua in, mi zosia mu dinga a siam hukdamna hi a mulo zosia'n mu ding in, Zakai gual in ei dâl thei zosia taisan in mu gua'i tiu.

### 2. Kumtuang hinna neina dingin (Johan 3:16) :

Mihingin i ngai pawimaw pen leh i ngai khawk pen chu hinna hi ahi. A hin, tuni i



ngaitua dingua pawimaw diak chu zia leisiat damsunga hinna mai hilo in, Pathian in kumtuanga hinna i neina dingua a chapa mihing ah a hung piang sak ziak hi i ngaitua dingua pawimaw chu ahi. Mihing lam ngaitua in i damlo phat leh hinna leh damna i ngai pawimaw zia kin i damna ding leh i hinna ding in nek leh dawn ding i ngai pawimaw ma mau hi.

Pathian in a hileh zia lei chung hinna bep hilo in kumtuanga hinna i neina ding un a chapa khawvel ah mihing gual ah hung pian sak in a hepina ziak in a ging taphawt â ding in kumtuang hinna neina ding in a chapa ei pia'i. Sepdaw ziaka mu ding hileu hin mitampi a sem theilo leh mulo ding um ding i hui. Pathian in i chan dingua ei dawisakna lian tak mai, hun chawmcha sung a ding mai hilo ah kumtuang ah Ama tawh hinna i neina ding uh hi nei chiat ding in i kichial uh ahi.

### 3. Diabol nasep sukmanthaina ding in (I Johan 3:8) :

Jesu Khrist khawvel ah a hung pianna ziak chu Diabol nasep sukmanthaina ding ah hung piang ahi. Mihing in Pathian thupiak zawplo ziak ah Pathian tawh kizawpna a seta, mihing a Setan nasepna um in Pathian dawidan sep daw takte chu Pathian dawidan sep daw kit theina di'n setan nasep sukmanthai a ngai hi. Jesu neilote'n Setan nasep a subei thei puau. Diabol nasep sukmanthai nadi'n Jesu'n eima hinna thu a nei a ngai hi. Tulai in Khrista nungzui kiti ngal Setan nasepna hinna bei theilote â ding in kingaitua kham ting ahi. Khrista i nei nau apat in Diabol nasep sukmanthai gua hitiu. Jesu'n Diabol nasep sukmanthai nuam in mihing in a hung piang hi.

### 4. Kichamna ding in (2 Korinth 5:18) :

Mihingte, Adam apat gitlona a la umta, Pathian



tau a hi. Chun, kipak bek set ziak in a thil nei lak ua itchak na panglo hial in a go bawm teu hong in thilpiak chu a pia tau a, mi khenkhat gen dan a chun thilpiak piate kha mi 3 a hi'u ti pawl a um ua, amau a hi leh Melchoir in sana a pia, Casper in Begaw, Balthazar in Murra a pia'i, ti'n a gen u'i. Sana hi Lal Jesu hi Lal a hi na etsak na a hi. Begaw hi zawlnei leh thiampu a hi na chu leh Murra chu thil gimtui a hi gual in Jesu gimtuina, a thina leh a thawkitna etsakna a hi.

Aw leh unau tuni hin Jesu pian champha Khristmas mang ding in mun gamla tak tak a kipat in la hung a, khenkhat chu naicha kipan le la hi mai thei hi. Lâ phuaktu ten "Jesu tuni hin ka lunggil bawng in a hung piang thak kit in nang ka kumtuang lal ding in" a ti gual in nang lunggil sung in le a hung piang tak tak na diam? Kipak ziak in piak ding, Bible a chun ka cha la lungthim gil tak ei pian a ti ziak in i thil nei lak ah a hawipen pen leh a thupi pen pen chu Jesu nausen lawpna ding in i pia phal thei na diam? Pathian in thil lopi tak a chapa nei sun kumtuang hinna i nei na

ding ah a hun piak hin, nang bang piak ding la ti em? Lâ phuaktu ten "ka pum in kipia ziang ing ka zia bep chu ka hi thei" a ti gual in, Jesu pian champha bep lawm ding hi lo in kumtuang hinna neina ding a hung piang hi, ka aw neisun hi tawp ta leh khawksa puangka a ma chawihawi na'n ti'n a ma i pak in i chawihawi ding a hi.

Tuni hin Khristmas i mat dan teu leh a hun a hung tun di i ngak la dan teu hi nungsui thak kit tiam hi tiu, nik leh puan a thak thak i nei ziak a a hun mat ding hi ngakla i hui em? a hi lo leh nek leh dawn di thil ah ngak la khat i hi kha diam? Khristmas hi kum tamtak la mang ta a hi mai thei, i mat dan a hin ei mau ei tandawk ding ah tawmtak mai ah hung piang tu hi a kipak thei na diam? Kilunggel thak inla, kingaitua thak kit in pian champha gual bep ah mat hin Khristmas la matzaw leh nangma le a kichai hin la ti'n kipakna tak tak leh lungmuanna tak tak nei thei lo di la hi. La kumtuang lal ding ah hungpiang tu kipakna tak ding in mang thei ding in Lalpan hun malzawl ta hen. Amen.



lo na mun a chun Pathian chapa hil hial gan ankuang a hung lum ziang chu a mak tho hi lo maw! Zia gan in a hin mihiante ankuang a um pua, Bawngbuk sunga gan anpiak na kuang in a hung ki thuk dawk mai a hi zawi. Van hinna an chu nang nek ding in.

Luka 9:58 a chun Lalpa Jesu hin a senlai bep in mun neilo a hi pu, gam nuai a chun si-al ten kua a nei un, chung leng vacha ten le bu a nei u'i. Himaleh, mihing chapa hin vang lungak na ding le a nei puai. A pianna mun hi a niam talua deu vei, lâ phuaktu chun "La van khawpi tualnuam chu, la ngai pua a hem? bang ding ah gan ankuang ah hung piang ziang la hem?" Nangma leh keima zia a hi, khawvel gitlona khan Pathian chapa chu a ko tha suk a hi'a. Tu hi le Khawvel gitlona a sang ma ma ziangta, zia gitlona hin Pathian chapa hi ko tha kit ngei ding a hi.

Mathai 2:1-2. Sualam ah mipil te Jerusalem a hung ua, khawi ah a hem Judate lengpa hung piang chu, sualam ah aksi ka muu a, a ma chibai buk ding hung ka hi'u a ti'u a. Luka 2:10-11 ah vansawlwchak chun a kiang un lau ki un la

ngai tiam un, mi zosia â ding ah chanchin kipak um tak ka hun tut hi. Nang uh a ding in tuni hin David khawpi ah Hukdampa a hung piang tai, Lal Khrista chu.

Bethlehem ah hukdampa hung piang chu sualam mipilte hi thagau lam ah beng vak tak hinau. A nei a lam uh lultak maite pe ding in saklam(sualam) a kipat in a hung tawp mai u'i. (NIV) Bible in a gen dan in (April 8, 458 BC- August 4, 458) a hi ti in a ki mu'i, zia gual ah tha 4 lam gamla tak ah kipat a hung ziang uh hi a mak ma ma hi. (Ezra 7:9).

Ei un le sualam mipilte gual hin Bible in a gen hi taksang in a mau gual hin pawm leu hin bangtin hukdampa Jesu chu mulo diak di i hi'u em? Mipilte chule Pathian bep in a kinga'u a, Pathian in a dawisakna chang thei ding in a siam a, tichun Pathian dawisakna chang in aksi zâl in nausen kiang a hung tung thei tau. Mipilte'n nausen va lawp bep ding in hung a hi puau a, thilpiak pia ding, Nausen munuam, nausen chawihawi ding a hung a hi zaw'u. Tichun nausen chu a mu phat un bawkkhup in a bia



apat ah khendan a la hi ta. Pathian tawh a la kicham thei talo chu, kicham theina ding in a chapa khawvel ah mihing gual a hung pian sak in a hun siam ahi. Khrista, i gitlo zia kua hung piang mihingte'n i mutheina dingua Pathian thil guat hi a lopi khawpmai hi. I sualnate'u kipuung in Pathian tawh i kicham theina ding in sual thupha chawi hi ti'u. Lalpa'n Ama tawh kicham lote kicham ding in ei ngak zing hi.

### **Thukhakna:**

Pathian in Jesu mihing ah a hung pian sakna hi thil pawimaw tak ahi. Mihingte hin i ngaitua phat ding un dawu um kasa ma ma hi. Mangthai ding i hui a hiat zia kin i manthai ding uh dawilo in, mangthaite hawla hukdam ding in mihing in a chapa'n a hun piansak ahi.

Chuleh, kumtuang hinna i neilo uh chun, thina chu i chan ding uh ahi zia kin, Pathian in a chapa ging ah

kumtuang hinna i chan ding un ei siam piak ahi. Gitlona la um zing leh kumtuang hinna neilo ding la hi. Sual sim in Lal Jesu gin mai a ngai hi.

Mihing a Setan nasepna um zosia Jesu Khrista'n ama dawigual i septhaina dinga a sukmanthai nawp zia kin Setan nasep zosia sumangthai ding in a hung piang hi. Nang ma ah Setan nasep Jesu Khrista zia ah sukmanthai ahi lo chun Khrista tawh la kizawpna ngaitua thak in.

Pathian in sualna zia ka ama tawh kichamlo le Khrista zia ka chamna ei siam piak in, i nei lote leh i chanlote le nei leh chang ah Pathian tawh kichamna umthei ding in Lalpa'n simtute zosia malzawl ta hen.



## KHRISTMAS AH HIDING

*Luka 2:17-20*

*- Rev. Khaisonthang  
i/c Phaipeng Bial Pastor*

Khristmas huna hi dingdawl thilpha tamtak a um ah. A bulpi penah chun Khristian hi phawt a ngai ah. Hukdampa dinga hung piang chu eima a dinga i kipawmlo chun ziani lopi mat leh matlo in ei sudanglam lo ding a hi. Khristmas lawk taka mat theina dingin i thu ngaithak leh lasakte sangin i thilhite a pawimaw zaw'i. Chanchinpha Luka ah kizik, Khristmas mang masapenten a thilhiu apatin thil pali taklang hiti'u.

### 1. Belampute thugen (Luka 2:17)

Palestine gama belampute chu khawtang ah dinmun niam leh tawden ah um a hi tangpiu hi. Mi zuauthei leh khawksakna neilo ahiu ah, vaihawmna ah le belampute chu hiatpitu dinga pawmlo a hi'u. Chenna mumal neilo, kinneppi theilo, lekha helo, insung khawsak ah le michaga a hi deu sek u'i. Jesu pian hunah vamu masapen leh Jesu pianthu puangzak masapen ahi ziang thei uh hi Pathian lemguat a hi. Pathian dawidan leh mihingte dawidan a kibatlo dan a hiat thei ah. Belampute

guala miniam leh khawvelin a musitte kianga Pathianin a chapa a hun sawl ahidan le a hiatthei hi. Belampute thumatna hile a lopi hi. Zankhang laitakin angelte'n a hun kaitho ua, a belamteu vengtu neilo ah nusia'n Bethlehem lam ah nausen piang chu a va hawldawk mai u'i. A vamu phatun, a chiadawk ua, a thilmuteu chu midang ava hilsawn ngal u'i. I lawi leh paite kianga chanchinpha gen leh i thu hiatte dinpi ngamlo ah i umsek uhi belampute i phaklonau pakhat a hi. Khristmas apat zilding chu, Pathian thu mat ah, ei sawlna ah chia hi a hi.



## KUMTUANG LAL DINGIN HUNG PIANG THAK KIT IN

*-Rev. N. Khanpau, Jubilee Kochuam*

Nidang lai pi leh pute'n Khristian a hi masang un kumtawp phat leh gualnawp bawl in nuam tak leh kikhela tak mai in ni sawt pi pi hun a la mang sek ua, zia chu kumkhat sung ah gualnawp thupipen a mat sek nau chu December tha bei kuan lam a la hi sek hi.

Kum hung chia zel in Khristian i hung hi phat un zia chu ettawn in mang lo ma leu hin December 25 hi nunnawp gual dan in sat ha tei tei ah ankuang siam tei tei ding gual in i ngai sek uh hi leh a kilawm hi.

Kochuam nu leh pa masa te chun a hun chet hiatchian hilo maleh December 25 hi Khristian ten hukdampa Jesu Khrista pianni ding in mat chiat pha a la sak ziak un tuni tiang a hin a la kimang zing a hi.

Khristmas chu gen ding dan tampi um maleh Khrista luai thenani tin gen hi tiu. Luai thena ti hi Khristiante â ding ah sa tha tei tei ah ankuang siam tei tei ding tina hi puana. Khawvel migilo zosia Pathian tawh a la kikhena zota, kicham kit theina ding ah Bethlehem bawng in sung ah van Lal chapa chu tawm tak ah a hung piang a hi ziak in kipak tak in a ma chawihawi in pak nala i lem zawk na ni diu a hi zawi. Bethlehem vaithum ka hi a la ti a hia, kua le a ma hung pian na ging ah pawmte

chun kumtuang hinna a nei ngei ngei diu a hi ziak in a hung pianna ziak le a hi. Ziak a chun lim in i lawm sek uh a hi zawi.

Lalpa Jesu hung pian dan hi vak nung sui thak kit tiam hi tiu. Tangval Joseph in a nungak ngailai in nau hun vawp ziang chu haisan guan tin, kichenpi le nuamlo ding mawng a hi. Mualpho um sa ngei ngei ding a hi.

Himaleh, vansawlhak hil gual in Thagau thiangtho vawpsak a hi ti a hiat phat in a kichenpi ta a hi. Bethlehem kua minkhum ding a ti ziak un malzin tampi chiakhawm a hi ziak un Joseph te nupan chu khualbuk in a dawl ta pua bawngbuk a chun a tung tau. Zia ni chu tunkim ni le hi ngei in tin, zia zan a chun panpitu leh naulaidawm ding le um





ua a tun thei nading in, 'ei an kipak um Hukdampa hung piang chu' ti la sa'n i lungthim gobawm teu hawng in, man bei **Chibai** mantam, i Lalpa kiang in **Chibai** buk hi tiu.

*“Aw Lalpa la maljawlna lûl ka bangkim chung un a lang, la thu lo chun ka hinna hi ka nei zosia tawh bei na”* ti la siamtu'n ati gual in, hinkhaw chawmcha i nei sung uh hi Lalpa a di'n kipia thak leu hin ka nuam hi. Keima ngeile damzing ding, thina tuaklo dingah kala ki ngaisek laiin, ginchaklo kei ah mabak laklaw tak tak neia i hiat khenkhat te, 'a thi ta'i' ti thu ka la he sek ah. Ka lungthim in, zia Bible chang hi a hung kilang veng veng sek ah *“Ka damsung nite'u chawmdan ei zilti in, pilna lungthim ka nei pha hial na ding in.”* Mihing damsung chawmcha a hidan hethiam in a pauchap a hi kha. Aw! kei sang ale naupang nalai katite haw, mi khenkhat te'n a damsung chawmdan uh Sam ziaktu lungthim kikawppi

phalo in khawvel ei nutsia san himai khana'u ti kangaitua chang in, ka lungthim a khawi ma ma sek hi.

Khristmas leh kumthak kipak umtak ei musak tu Lalpa Pathian chawihawi in, lasa'n **chibai** buk in pak hitiu. Damlai hun chawmdan te geldawk thak ah, Lalpa Jesu nausen, Herod in sukmanthai a guat gual akhan Setan in ei uh hung them zing a hi ti hiazing kawm ah, ama akipat zammang in Pathian chu Thagau leh titak zet ah **Chibai** bukte Lalpa'n a dawi a hi. Aw ka hinna, Lalpa chu pakin Chibai bukin. Paul in *“Kithawina hing leh Thiangtho ah la taksau chu kilan in Chibai buk in”* ati gual in, Bethlehem bawng in ah ei uh a dingah Chamna Lalpa hung piang chun eima'u ah ki ngainatnate, ki ngaidamnate, muanna leh kipaknate'n, eima leh i insung mite leh invengte leh Kochuamte kiangin um zing ta hen, AMEN.



## 2. Lamdang saknan a dim ui (Luka 2:18)

Belampute thugen he taphawt chun lamdang a sa thei mamauhi. Zankhatsunga thiltung ding leh belampute gen dingin a lamdang talaw him hi. Angelte lasak hekha a um puau ah, Pathian chapa bawng bukah piang le a hekha puau. Khawvelin mak asak ding leh ginchaklo ding ngenin Pathianin thil a hisek ah. Khristmas zingkala a pian lai ah mak a sak sangun a hungkit phatleh maksa zaw diak nalai ding i hiu.

Gingtute hin i maksak dingdawl tamtak mak salo hialin i um mai mai thei ua. Maksak theina hi naupang lungthim ahi i tiu ah. Naupangte gualin Khristmas ahin lungthim pu leu hin lawkpi ma ma ding i hiu. Thilmak i ma-angun a umah. Pathian mihinga ahung um theidan hi thilmak a hi. Lei leh van siamtu zan khat giakna ding chang zolo hi thilmak a hi. Migilote hukdam dinga mithiangtho a hung kipat ziang hi thilmak

a hi. Khawvel ahin Pathian kengnung a dimin a um ah, khenkhat maksaknan a dimua, khenkhatin bangma'n a ngai puau. Akcha leh ganca kithatte mak isau ah, gen thatnawp um i sau ah. Khristmas nikhua hin thilmak tamtak damsunga gen kham a um hi.

## 3. Ngaitua zui zel hitiu (Luka 2:19)

Mari'n chun thiltungte chu phatakin a lungthimah ngaitua in a tepte hi. Ngaitua zui umzia chu, hiatmil lona dinga vawp pha, lunggila kawitup, vawpdet, tina a hi. Zia khelah chun, bang thil ahem, a umzia bang ahem ti ngaitua chian leh suichian genna le ahi. Gabriel hung kilat apat thiltungte kha Mari lungthim mitthan a chamzing ah, a ngaitua veng veng sek hi. A hiatthiamlo le tamtak um ngei ding a hi. Pathian thilhi tam tak te banah, bangziaka Pathianin ama khel khel tel a hem tite, a chapa tunung hinkhua banggual ahung hi diam, tite hi ngaitua ngei ding a hi.



Mi tamtak a dingin ngaituana mat hi thil haksatak a hi. Miten zu leh khamthei a bawl ziaku le a ngaituana leh puakgikteu dawn jangkhai ah a hiat ziaku a hi. Damdawiin thuaka na a sep phatleh ngaituana sen a ngai pua, lungthim le mat a ngai pua, ziachu mi tamtakin nuam a sau hi.

Khristmas leh kumtawp hunte hi ngaituana matna hun a hi. Pathianin kum tunga eipui dante, kumthak ding thillawk ah guanggalna siamte, i hun chiasa leh tunung ding thute ngaitua hi a pawimaw ah. Taksa khawsakna banah, thagaulam ah le ngun taka ngaitua ding a tam ma ma hi. Tukum sung maiah nangma hinkhua ah la thiltuak leh thil hiat zosiate ngaitua le chun, la kianga Pathian kipuanna hiat thei ngei ina. La hinkhua ah thiltungte, la thilmu leh hiatte laka pawimaw diakte bangle tepte inla, lungthim kihawng takin hiathiam gua lechun, Pathianin a hung kihopina hithei a hi. La lawtinna leh

lawsapna te, la zawna leh guallelna te, le kipakna leh dana te apatin Pathianin ahung zilsak nawp um ding a hi. Ngaituana hin Pathian lungthim ei hiatdawsak bep hilo in, ei leh ei le kihiat chian deu deuna ei pi ai. La thiamna te, la lunglutna lamte, la hatlona lam leh la taksapte la kimudaw k thei ah. Zia kipat chun tunung ah la malakna ding hung kilang in tin, la pauchapna leh Pathian kianga kilatna ding tam tak mu'n la. Mari'n thiltungte chu a ngaitua ah, eiun le ngun takin ngaitua hi tiu.

#### 4. Pathian chawihawi hinkhua (Luka 2:20)

Belampute chu a thilmuu ah kipatin nasa tak ah sukdanglam ah umin, Pathian chawihawina'n a dim tau hi. Bawng buk sungah a thilmuteu apatin Pathian thilhitheina, a hepina, a phatna, leh a pilnate a muchian ua. A thilmuteu chu thipsan hiau ziang loin Pathian a chawihawi tau. Bible chun "*Pathian chawihoi leh pak kawmin a chiakit tau*



takte hi, eima leh eima kitel daw k zo talo, buanthuak lak ah pat kiteldaw k zolo ah i kitel hat po leh ki tum deu deu ta mai a hi. Leng Herod gual in kua i ngaw tadium uh? La siamtu'n "*Ka lungthim gitlo lua nung kha; la Temple hun chansak inla, hung piangthak kitin nang ka kumtuang Lal ding in,*" ati gual akhan, Lalpa a dingah i lungthim i piakthak ngamna hi, eiun le La siamtu lungthim tak kha kikawppi in, Hukdampa pianchampha lawm theilo ding i hi'u em?

Vansawlchak Gabriel in Mari **Chibai** a buk apatin, Marin le "La thu gual gual in ka chung a tung taken" ati thei na zia k chu Pathian suang ah **Chibai** a kibuk thei zia k uh a hi. Zia kipat chun Chamna Lalpa a hung pian thei ta ngal ah. Zia bep chule hilo in Belampute'n le a belam teu nusian, nausen leh anu Mari chu **Chibai** ava buk tau ah. Lim leh kipak tak in a kilekit ta'u ahi kha. Saklam michingte'n ama'u

pilna mangin Leng Herod in ah ava tung ua, buaina leh lungzinna tuntua a hi mai ukha. Belampute gual in Lalpa Pathian suang in, khawvel lungkhamna, lunggimna te nusian in, **Chibai** ibuk diam uh?? Ahilo leh Saklam mipilte gual in eima mihiam pilna leh hetna mangchan **Chibai** ibuk diam uh? ti hi ngaitua chiat hitiu.

Lalpa Jesu pianchampha imat na'u ahin, eima'u ngaidan leh dawidan ah setan suaka lutkit talo in, Nausen **chibai** buktute'n limtak leh thamuang tak ah a kilekit gual ua kha, ei unle Nausen chibai i buk u chun, i hinkhuau ah hindan lui nusian theng a, hinkhua thak a Pathian tawh hing mi hi ding ihu. Zia gual hinkhua thak a chun "*Aigupta sabel ngai lo in, ei pui zel in*" ti la sa'n Pathian pak zing ta'tiu. Sam ziaktun "*Aw ka hinna Lalpa chu pak in, ka sunga um zosiate*" ati gual in Lalpa pak pumin ki chibai tua in, limna leh kipumkhatna i lak



tu pakhatin ka hiadawk sek hi. Chuleh, khut kisantua se se lo ale **chibai** i kibuk tua zing thei ua, Insung kuan khata cheng khawmte'n le chibai kibuktua zing hi thil chin dinga pha mama khat chu a hi. Zing thawlima mai tai sisiau a, kimutua masapen te chu i insungmi i chanaute ahiu a. Unau, nuchan, pachan kimutua masakna pen ah **Good Morning** kiti mai hile lul tak a hi.

Elizabeth gilpi sunga nausen ahung kichawp/tawi ziak leh Elizabeth Thagau Thiangtho â a hung dimna ziak diktak kha, a suapinu Mari'n chibai a buk ziak a hi. La siam tu'n "*Lungsiat in la nu Mary gual in ei ngai in, hung piangthak kit in, nang ka kumtuang lal ding in*" ati kha. I lungthim sual buak a dimzing, ngaituana phalo, duamna, lunggimna leh lungngaina leh lungkimlona a dim zingte hi '**Chibai**' ziak in Lalpa ah kipakna leh limna ei tun sak thei zing a hi.

Mari'n a phung chanpi Juda nam ah mualphona tawpkhawk maitua ah, beidawng mang batah a um lai in Vansawlchak Gabriel in "*Mari guatchuam, Chibai, lau kin. Lalpa la kiangan a um hi, aman hun umpi intin la sung apat Messia Hukdampa hung piang intin, mi zosian vangphanu hun tinna'u.*" atia. Ziaphat chun Marin "*Aw Lalpa la thu gual gual in ka chung in tung ta hen,*" atia. Amen ati thei ziak in, mualphona leh thiding tiang a huam ngamna kha midangte, kei natiang a dingin malzawl na leh hukdamna thilthawn piak, chan guallo Lalchutpha i chan nau, a hung hi tai. Mari sungah nausen hung piang khan, Leng Herod lungthim ah itsikna'n ahung dim ta. A hiatlo kala Lal ding, lengpa in ah apianlo ziak in nausen kumli nuailam zosia a thi khawlaw tau hi. Setan in a lungthim itsikna ah a luadim sak ziak a hi kha. Zia gual ma chun i hinkhua limlo tak mai, i lungthim sual in a lua dim



hi" a tia. A khawsaknau leh a dinmun leh mawpuaknateu kitheng danglamlo maleh, ngaituana thak leh lungthim thak a pu tau hi. Khristmas hun hi Pathian chawihawina hun ahia. Himaleh, ani hung bei intin, khuanggitte hung thip intin, i sep ngai ngai, i umna ngai ngai ua kilekit hun hung tungkit ina. Zillaite a zilna mun ua lutkit in, nasemte le i sepban chiatu sepkit hung ngai ding a hi. Ziaphat chuleh Pathian i chawihawi nalai diam uh? Khristmas imat uhin ei sudanglam na diam? Nausen mel ah Pathian hiatchianna leh kipakna thuguk chu Khristmas kichai nungin

le a bei thei ta pua'i. Nisin leh hunsin hi Khristmas guala mat thei a hi. La chiana taphawt leh la thilhi taphawt ah Lal Jesu vawp detin Pathian chawihawi zing lechun, nanga dingin nisin mai hi Jesu pianni guala mat thei zing ziang ding a hi.

Tukum Khristmas ahin, chanchinpha bu ah imu gualun Jesu pian he nailote muthei leh hiatthei dinga amin puangdawk in, Pathian thilbawl lamdang takte lungthimah ngaitua zuizel kawmin, nisin ama chawihawi zing thei leuhin Khristmas mang lawting hiding i hi'u.

*2019 Piting Sunday School Zillai Bu hi  
December 20, 2018 tianga Manipur Area  
Office-ah ngaiven chiat dingin Kochuam  
te i kihatsak u'i.*



## KICHIBAI

Luka zia 1:41

By: Rev. K Lala  
Salem Veng (Lamka Kochuam)

Khawmpi Chairman lui leh Chairman thak te'n mawpuakna akisantua nau ah kampau ki mang sek chu "Chairman kikhutsan" hi a hi. Chairman a pawtdawk di pa'n dawisakna sangpen chu a thu gen thaw mai hilo in akhut changlam kitutua in a dawisakna sangpen a pia (*a lan ah*). A thak ah mawpuakna lading chairman pa'nle dawisakna piakah um chu mawpuakna liantak leh huphul umtak himaleh thei chanah maw paw ngam dingin Pathian leh a Kochuamte suangin kipak tak in akhut changlam pia'n **chibai** kibuktua in a pawmta. Zia chu, "Kikhutsan" ti in khawmpi'n pha akisak dungzui in tutiang ahin mat ahi zing ta. Zia thute apat hin **chibai** ti umzia leh a lul zia hi ka lungthim in alian ma ma ta.

**Kichibai** umzia hi gendan, kawkdan, ngaidan chuam chuam tamtak a umthei laiin Pathian thu lam tawh kituak a gen latdi apawimaw takzet mai hi. Chanchinpha Luka zia 1:41na khan "*Elizabeth in a suapinu Mari'n chibai a buk chu a hiat phat in, a sung ah nausen chu a tawi a; chun, Elizabeth chu Thagau Thiangtho in a hung dim ta,*" a ti. Bang gual ah chibai kibuktua a hi diam uh? ti nasa takah ngaitua kham a hizing laiin, ken vang chibai a kibuktua dan sang in a umzia zawk hi kala ngaituah zawk chu a hi. Khawvel mun chuam chuam ahin khenkhat chu lampi a kituak phat ua leh luchang kun ah chibai kibuktua in kichia pel ziang, chuleh khenkhat khut kizak khumtua mai mai, a zaw lungdam-lungawi mel kimutua a kitaipel nunga le mi mel put hawitak latsak, tite zosia hi nam pitingte'n ala



chindan hawi khenkhat ahia. Ahinla, ei un vang khut kituktua (*handshake*) hi ila chindan pen uh, **chibai** kibuktua chu a hi. Kichibaitua hi ki mel hiatna leh ki ngainatna a taka suklatna chu a umzia khat a hi.

**Kichibai** hi bangma kisenna umlou keia mite kipakpina leh lungawilungdamna bailam pen, i bawlthei pakhat a hi. **Kichibai** hin ki maipiaktuana te, ki nelna te, ki pumkhatna te, ki chamna te, ki pumpiakna te, ki thakleltuana te, leh ki ngainatna te haw a taklang ah. Khawkhat, veng khat, khaw kiang mite haw nui-mel kimu khat deu chang inle chibai i kibuktua chun mite lungthim a khawi a, gending hung um mai ziang sek a hi. Office kaite leh zillai te'n le sepkhawmpi te leh lawipha te akimu tua chang un le, chibai kibuk tua zing ziang sek leu hin chu thilpha ma ma hi ding a hi.

Keima hinkhua ngei ah katuak khak, tu tiang ah ka hiatmil theilo le a tam khawp mai ah. Kum 1968

hun lai a, Lamka lam zuanah school kai a kachia sek laiin, Mata ah Vungzagen High School teacherte, adiak in Pu Larzar (Headmaster) pa tawh lampi ka kituak phat uale, cycle taikawmin chibai ka kibuktua sek ua. 1997 kuma Assam gamsung a um Kamranga khua ah Meitei Pastor Bialtu masapen ka hi laiin, Bial fanga Jiribam lamin kala chia. Ka bialfanna kochuam member te'n Churachandpur lam mi Officer fel ma ma khat, zia mun ah ki-posting um chu ka munawp ding gingcha'n a Office ah ei pui tau a. Keile kiphalam tak in kava lut leh, Zillai ka hi lai ah lampi kituak sinleh chibai ei buk masapen, ka Headmaster pa ngei, Officer lian tak ah ala kaisang chu ala hi ta. Ei mu phat phat achun **Chibai** ei la buk masa ngal ah, ka lawite chun mak a sa khawp mai u'i. **Chibai** kibuktua sek **GA** chu ka mu chian mama ta, kihiatdawk thak nate, kingainatna umzing sak bep hilo in kipumkhatna kilatsak